

清史列傳

清史列傳 卷四十八

大臣畫一傳檔後編四

黃宗漢

黃宗漢福建晉江人道光十五年進士改翰林院庶吉士十六年散館改兵部主事十九年充軍機章京二十年六月補官七月陞員外郎十一月記名以御史用二十一年陞郎中二十二年五月陞山東道監察御史巡視中城十一月遷戶科給事中二十五年掌工科給事中尋授廣東督糧道二十六年兩廣總督耆英奏舉辦保甲及會哨事宜請以宗漢督其事得旨允行二十七年調雷瓊道二十八年陞山東按察使二十九年調浙江按察使三十年巡撫吳文鎔疏薦宗漢可膺重寄命來京陞見咸豐元年正月到京召見六次八月擢甘肅布政使二年二月授雲南巡撫旋調浙江巡撫十月以籌議新漕疏請試行海運得旨允行十一月覆奏海運章程分催提銀米雇備船隻兩次接運委員分辦天津撥船多爲豫備巡哨防護宜加周密各條均如所議行又疏言浙江新漕試行海運係屬創始其

不敷船隻應由江蘇上海添雇請由兩江總督江蘇巡撫派委妥員幫同辦理得旨江蘇浙江海運事宜著該督責成江蘇按察使倪良耀總司其事不分畛域安速籌辦尋捐備軍需銀一萬兩先是浙江布政使椿壽因錢糧支絀在署自縊命宗漢詳細考察是否另有別情據實具奏至是奏言該司因署撫任內湖屬八幫漕船水淺未能開行留浙變價部定每石價銀二兩市價每石僅得七八錢計短銀三十餘萬兩該司無力分賠焦灼自盡並無別情尋奏請將原米隨新漕輓運入京報聞又以署寧波府知府畢承昭卓著循聲請破格補授實缺允之三年二月以浙省當災歉之後又值長江有警商販鮮通民間乏食請將商販米船免其納稅得旨允行時粵逆東下直逼江寧省城漕運總督楊殿邦駐紮瓜洲江蘇巡撫楊文定駐紮常州均以兵力不敷咨調浙兵二千名前往防堵宗漢疏言浙省兵丁除省城暨水師各營不便徵調外其省外各營曾於上年調赴江西安徽三千名並經挑選一千名赴省設局操練嗣准江蘇藩臬兩司請豫調浙兵爲該省策應又經飛飭各營豫備二千餘名以資調防均經奏明在案此外未調之兵爲數無多不敷兩省分派見於紹興海寧兩協營再抽調五百名合之前次調省操

練暨飭調豫備之兵均勻酌派調赴漕臣江蘇撫臣各八百名本省嘉湖二府各給八百名並令官紳速募義勇以補兵力之不足報聞旋因江寧城陷賊船四出竄擾宗漢聞賊至蕪湖慮其窺浙飭藩司麟桂馳赴上海募廣艇以備防剿奏入上嘉之尋命宗漢卽飭麟桂將所備船隻親爲統帶前赴鎮江等處聽候向榮調度四月宗漢與將軍宗室有鳳等馳奏浙省防務吃緊咨會欽差大臣琦善向榮等迅速進剿堵賊下竄並馳赴嘉湖扼要抵禦遏其入浙之路報聞六月宗漢由嘉興至吳江復由湖州至泗安察看形勢直抵安徽廣德州界查其中分兩路一爲界牌汛一爲東亭湖汛毗連長興安吉爲尤要卽飭副將都隆阿帶兵駐紮以防閒道竄入宗漢仍回省城居中調度奏入奉硃諭浙省防堵不容稍懈若果有粵匪闖入尤應赴境迎剿不可先示以弱致滋蔓延宗漢復疏言防堵之法不可僅於本境畫疆而守因檄副將王懋都隆阿帶兵赴鎮江常州協防其由蘇至嘉興水路扼要在平望以副將葉萬清守之由蘇至湖州水路扼要在太湖以遊擊孫國安守之由安徽至湖州旱路扼要在泗安廣德以知府常恩守之外分三路設防仍檄副將田大有於嘉湖二府居中策應又委臬司黃樂之帶兵履勘扼要

設伏至省垣添礮安營嚴兵守衛所需經費均請動撥帑項得旨布置尙屬妥協省垣要地分撥兵勇守衛並安設礮臺調水師之處均著照所議辦理時倪良耀總司海運事宜所報海運米石與浙省起運之米數不符宗漢劾之並劾其眷屬遷徙以致官兵惶惑請下部嚴議允之又以海運事屬創始知府晏端書同知繆梓出力爲最疏薦之命俟海運事竣再行聲明請獎七月得旨此次海運事屬創始經巡撫黃宗漢督同司道參酌成案經理得宜不及四月卽以全數起運交兌完竣辦理實屬妥速自應量予恩施以示鼓勵黃宗漢著賞戴花翎餘各交部議敘時浙江災歉頻仍賊氛密邇匪徒多藉端倡亂糾衆抗糧之案層見疊出宗漢先後派委員弁查拏懲辦解散脅從地方獲臻安謐請將未能預防各員分別治罪並自請嚴議尋下部議處降二級留任先是上以吏治民風相爲維繫諭直省各督撫於府廳州縣慎簡賢員政成報最後必當破格施恩超擢不次經給事中吳若準奏浙江州縣中如段光清等皆係循聲卓著之員命宗漢悉心察看至是宗漢以段光清素洽輿情請破格錄用得旨段光清補授寧波府知府以爲地方官能得民心者勸尋以捐備浙省軍費並率同子貽楫捐閩省軍餉一萬餘兩得

旨黃宗漢子黃貽楫著賞給舉人准其一體會試十一月蘇省匪徒嘯聚陷上海宗漢請將來歲新漕另籌起運海口並酌擬改運章程入奏下部議覆奉旨浙江海運改由劉河口受兌放洋一切事宜經黃宗漢派員妥辦惟該處海口係江蘇所轄若轉令浙江委員催辦尙恐呼應不靈著怡良許乃釗立即派委大員並熟諳海運之員駐紮劉河口會同籌辦不得稍分畛域海船抵津以後應用撥船著桂良督飭天津道府寬爲籌備時安徽廬州失守巡撫江忠源陣亡命宗漢籌撥銀六七萬兩迅解和春軍營又因江南大營餉需支絀命向榮隨時咨商怡良黃宗漢妥籌辦理宗漢以書致向榮曰逆氛未靖大營軍餉告匱豈敢置之度外本省籌防卽萬分支絀亦當勉效汎舟之役惟所需甚鉅計日尙長縱使竭盡心血力爲圖維杯水車薪旣慮無濟況一省之精華易竭而通盤之籌算宜先似應統計大營共餉每月實需若干請於江蘇浙江江西三省確定額數每省應解若干按月起解何省貽誤指參何省而大營亦得以額定之數宣示衆兵不致缺乏自今以後軍威之不振責在將帥糧餉之不時責在地方如此劃清界限則事有專司責無旁貸不難指日蕩平向榮據其書入奏上躉之四年正月查明仁和等州

縣衛災歉地畝分別蠲緩以聞又奏保海運出力各員獎敘有差二月宗漢以浙省有漕州縣多被災歉其成熟田地雖獲有收因風雨蟲傷米質未能一律圓潔所有應徵漕糧請援照成案紅白兼收秬稷並納俾小民便於輸將如所請行旋諭曰浙江巡撫黃宗漢自簡任以來辦理各路防堵不動聲色措置裕如督辦漕糧海運亦極認真上年剿捕台州及杭州之昌化於潛並寧波各處匪徒與見在嘉湖兩屬聚衆抗糧匪徒均能立時擒獲辦理甚屬安速地方悉臻安靜歷覽該撫奏報精詳之至毫無瞻顧深堪嘉尚著發去朕書忠勤正直扁額一面賞給黃宗漢該撫領朕所賜御書不必作獎勵觀作紀實觀尤願汝慎終如始以成一代之名臣三月江蘇巡撫許乃釗奏請飭宗漢酌撥精兵五六百名助剿上海宗漢遵旨派知府石景芬副將慶祺帶勇前往時江寧股匪攻陷徽州之祁門黟縣有由徽入浙之謠宗漢以嚴衢皆與徽郡接壤必須門戶嚴密卽募勇調兵協籌防剿會寧波府屬之奉化地方有逆匪洪世賢以妖術惑衆乘徽州之警謀與安慶上海之匪勾結應援宗漢委道員段光清偵知其實易服密拏生擒世賢及僞軍師丞相董銓岡董得彰等訊明梟示被脅之衆一概免究奏入得旨嘉獎四月宗

漢以海運糧船將次受兌放洋飛飭各屬上緊剝運至劉河口並飭糧道周起濱等趕緊擇日放洋赴天津交兌先將辦理情形馳奏報聞七月以海寧仁和等州縣潮勢甚旺東中西三塘各工日形塌損奏請動款修築如所請行復以徽防緊急添派杭州府知府徐榮帶兵前往防堵九月諭曰昨據向榮奏閏七月間據黃宗漢以賊竄祁門將抵徽郡浙省危急乞師援救當經調川兵一千名前往嗣因賊匪退出擬將川兵移撥太平蕪湖乃爲徽寧官民苦留等語已諭令向榮將詳細情形知會黃宗漢妥籌辦理但未據黃宗漢奏聞不知徽郡境內匪蹤果否全行擊退抑有未能淨盡尙煩兵力之處江西屢獲大勝不能不慮及該逆旁竄徽寧腹地固須防堵而蕪湖爲進口扼要之區尤爲喫緊著黃宗漢與向榮熟籌兼顧總以不令賊船駛入內河爲要因思黃宗漢自六月初五日報到海運漕米全數放洋等摺以後未據續有奏報此數月內浙省摺報並未到京是否途耽誤抑該撫竟未暇拜發殊深繫念且粵東全省騷動各路文報不通前此葉名琛等奏報卽從寧波收口由浙馳遞此時浙江旣久無摺到粵東消息更不知若何著黃宗漢查明前此具奏事件有無遺失並探明廣東如有由浙馳遞之件飭屬趕

緊轉遞不得稍有遲延仍將兩月來浙省布置事宜迅速具奏旋授四川總督給事中張修育奏宗漢在浙已久布置合宜未便更易得旨朕簡任封疆大吏無不爲地擇人權衡至當若紛紛請奏未便更易尙復成何政體張修育著傳旨申飭十月宗漢以病咨請軍機處代奏諭曰前因黃宗漢數月未經奏事連次降旨詢問昨據黃宗漢咨呈軍機處公文內稱自七月起調兵籌餉搶辦海塘積勞成病閱四月以來未及拜發奏報咨請軍機王大臣先爲面奏等語各督撫應奏事件從無積壓數月之理黃宗漢平日辦事尙屬認真雖因調兵籌餉公事叢集而海塘衝坍關繫民生卽當迅速奏聞況學政丁憂臬司出缺應行由驛馳奏之案何竟憤憤若此經朕垂詢後尙不具摺陳奏竟咨呈軍機處懇請代奏尤屬非是有此辦理咨稟之暇何不卽行繕摺入奏況云浙境見獲救安該督病已漸愈亦不至刻無暇晷乃以遲延之咎自行請罪爲詞情節尤屬支離殊不可解黃宗漢著先行交部議處尋部議宗漢摺報稽延應降三級調用不准抵銷得旨黃宗漢著加恩降爲二品頂帶仍留四川總督之任十二月宗漢疏言此數月中始則因軍務緊急不暇拜發繼則因身體患病不能陳奏糊塗之見謂寧蹈遲延之咎不敢

以病假瀆陳惟請嚴加譴責奏入諭曰海塘決口關繫民生雖經該督設法搶護堵築平穩究屬未能先事豫防至該省摺報稽延已久該督旣已病痊卽應趕緊入奏乃自上月具文咨報軍機後又復遲至一月有餘亦屬咎有應得姑念該督在浙平日辦事本屬認真此次奏報雖遲於地方公事尙無貽誤業經降爲二品頂帶以示薄懲所有自請交部嚴議之處著加恩改爲議處尋經部議降二級留任不准抵銷五年正月克復上海縣城宗漢下部優敘時荆襄告警宗漢遵旨調派川兵赴楚協剿三月宗漢行抵川省疏報到任奉硃諭汝在浙尙恐汝過於亟速今在蜀不患失之於嚴惟患失之於緩汝之才力朕保汝實稱川督更望汝倚仗羣材自易見效五月宗漢疏言黔省餘匪竄擾川省之秀山縣經官兵練勇擊退所有出力文武請酌保數員又奏大寧縣知縣李肇金捐修城垣募置練勇懇請優敘均如所請行七月疏言販運黑鉛有關軍火請照私販硝磺例加等科罪又奏四川紳民捐輸助餉鄉試廣額請改爲永遠定額八月以遵旨訊明南溪縣廩生萬石鈺等被控謀逆委無其事告病永寧道汪堃自認辦理錯誤請予革職均從之會湖南巡撫駱秉章湖廣總督官文先後疏請借撥川餉命宗漢迅速籌

解九月粵逆復陷湖北漢川荊州喫緊命宗漢飭署松潘鎮總兵德恩帶夔巫防兵二千名赴荆協剿時四川馬邊地方夷匪爲患窺伺沿山漢地搭蓋夷棚鄉民屢受其害宗漢委文武紳團節次進剿共斃賊千餘名毀夷棚三千餘間匪酋就戮各夷震懾投誠馬邊一律肅清奏入上嘉其辦理妥速十月貴州巡撫蔣蔚遠奏調川兵四千名協剿苗匪並請撥銀十萬兩兩湖江皖等省亦以軍餉支絀均疏請由川協濟上命宗漢悉心籌撥十二月宗漢疏言川省庫藏歲入不供歲出近年勉力支持實賴津貼其數亦不過五十萬兩此外捐輸寥寥拮据情形殊難言狀然於各路餉需斷不敢稍有延誤應請於咸豐六年再辦按糧津貼此係萬不得已之舉一俟軍務稍平卽行停止並嚴禁需索浮收情弊得旨悉心妥辦六年正月命查閱四川營伍宗漢僅將成都省標會同春操查閱復久無奏報八月奉諭曰前因黃宗漢久未奏事諭令明白迴奏並諭樂斌查明具奏茲據該將軍奏稱該督素有痰鬱之疾今春感受時氣以致舊疾復發見在趕辦積壓案件精力尙能勉支等語黃宗漢平日辦事尙屬認真乃半年以來於地方應奏事宜並關涉軍務要件延擱不奏迨降旨令其迴奏又不具實陳明雖經樂斌查明該督

素有痰疾見在趕辦案件尙非有心積壓而封疆重任豈容以病軀久戀致令公務廢弛黃宗漢著交部議處卽行來京另候簡用十二月到京得旨前任總督黃宗漢前經部議以降三級調用著加恩改爲降二級以內閣學士候補尋補內閣學士兼禮部侍郎銜署刑部右侍郎旋署順天府尹七年六月宗漢以順天府採買米石平糶陸續捐輸請交部議移獎各該員子弟七月充玉牒館副總裁十一月英兵攻擊廣東省城兩廣總督葉名琛被給入英船經巡撫柏貴奏聞十二月命宗漢爲兩廣總督授欽差大臣關防辦理洋務召對十一次並命前安徽布政使畢承昭隨宗漢赴廣東差委八年四月宗漢到粵暫駐惠州府以各衙門案卷多被英人焚毀奏請將命盜等案題咨事件展緩辦理又請將兩廣應行引見文武人員暫緩給咨其陞補人員仍請先給署劄俱從之五月疏言廣東自咸豐四年土匪滋事攻撲省垣並蔓延數十州縣經各該處紳民捐資練勇隨同官軍相機剿辦深明大義惟未據葉名琛聲請獎敘應飭各地方文武檢查從前擬定原案申報查明保奏以獎忠勇而資觀感詔如所請十一月請將前廣東雷瓊道蔡徵藩浙江候補道邱景湘留廣東補用又以廣西省頻年被擾各埠鹽難運銷

請將引餉展緩分限搭銷又疏勅捕務廢弛之廣東遊擊吳銓光禡職均得旨允  
行時廣西賊匪竄入德慶州屬宗漢調撥兵勇擊退之九年四月調補四川總督  
命俟署兩廣總督勞崇光到任後再行來京陛見時江西信豐大股賊匪竄擾惠  
韶二郡宗漢駐軍龍川飭已革按察使張敬修署惠州府知府海廷琛督兵大破  
之復親督大軍分股追剿先後斃賊萬餘惠韶地方一律肅清得旨嘉獎十一月  
來京命以侍郎候補先是宗漢等奏廣東清遠各州縣緩徵銀米一摺遲至經年  
始行奏到上命宗漢明白迴奏宗漢覆奏係由巡撫主稿不知因何處延擱請飭  
由廣東查明十年三月命署吏部右侍郎九月實授十月四川在京主事葉毓桐  
等公舉宗漢督辦四川團練由都察院代奏得旨四川省督辦團練前已簡派有  
人黃宗漢既非四川紳士亦非該省見任之員葉毓桐等所請飭令督辦團練之  
處著不准行十一年九月兼署兵部右侍郎十月會議文宗顯皇帝陞配大典宗  
漢另疏奏請緩行定議上命王大臣等敬謹詳議寢其奏先是詹事府少詹事許  
彭壽於拏問載垣端華肅順時敬陳管見摺內有查辦黨援等語經議政王軍機  
大臣傳旨令其指出黨援諸人實迹至是許彭壽明白迴奏形迹最著莫如吏部

尙書陳孚恩蹤跡最密莫如侍郎劉岷黃宗漢外間嘖有煩言諭曰黃宗漢於本年春間前赴熱河蒙皇考召見卽以危詞力阻迴鑾迨聞皇考梓宮有回京之信該侍郎又以京城情形可慮徧告於人希冀阻止其爲意存迎合載垣等衆所共知聲名如此狼籍品行如此卑污若任其濫廁卿貳何以表率屬僚黃宗漢著革職永不敘用以爲大僚輒媚者戒又諭曰已革吏部右侍郎黃宗漢前在浙江巡撫任內經皇考大行皇帝賞給御書忠勤正直扁額見在黃宗漢已革職永不敘用所有前經御賞扁額著卽行恭繳同治三年故子貽楫同治十三年一甲三名進士改刑部主事

杜翰

杜翰山東濱州人祖塲禮部左侍郎本生父受田工部尙書協辦大學士自有傳翰道光二十四年進士改翰林院庶吉士二十五年散館授檢討二十九年提督湖北學政咸豐二年七月翰本生父受田卒於江南差次諭曰協辦大學士杜受田前因豐工尙未堵合江南山東兩省窮黎急需賑恤特派前往查辦竟以感受暑溼觸發舊患肝疾於本月初九日遽至不起伊子杜翰著俟服闋後加恩以庶

子用復諭翰由湖北馳赴清江浦扶柩回京三年八月服闋十一月補詹事府右春坊右庶子十二月擢內閣學士兼禮部侍郎銜尋命辦理巡防事宜稽察中書科事務並充文淵閣直閣事遷工部左侍郎命軍機大臣上行走四年二月諭往通州查米奏言查得大通橋挑晾米豆均屬不堪食用請分別著賠以歸覈實允之四月兼署工部右侍郎兼管錢法堂事務是月以工部右侍郎宗室國瑞奏參寶泉局監督桂榮王溥辦事含混任聽派頭剋扣匠役工銀翰不肯會銜又未單銜具奏上敕明白迴奏翰奏言所參該監督各款皆係國瑞未到任以前回明辦理之事以與國瑞意見不合故未會銜疏入命大學士賈禎工部尙書全慶查辦具奏尋奏覆諭曰寶源局監督桂榮王溥既據賈禎等查明辦公並無含混亦無任聽派頭剋扣匠役工銀等弊杜翰覆奏各情亦無迴護著毋庸置議旋賜紫禁城騎馬五年正月京察屆期下部議敘二月會議改票用鈔之法如所議行四月復以山東在平馬官屯逆匪蕩平交部從優議敘六月會議署吏部左侍郎沈兆霖請暫設皖南巡撫疏言皖南原有安徽寧池太廣道一員暫改爲皖南道專轄徽州寧國池州太平廣德五屬仿臺灣道例加按察使銜並添設皖南總兵一員

以資鎮守從之六年四月充殿試讀卷官十二月充經筵講官七年正月充經筵直講十月查東陵西陵歲修工程八年正月京察屆期復交部議敘四月諭同惠親王等專辦京城各旗營巡防事宜八月兼戶部右侍郎兼管錢法堂事務九月丁本生母憂賞銀四百兩治喪九年十月服闋署吏部右侍郎仍在軍機大臣上行走十年正月上以三旬萬壽恩賚廷臣翰加三級三月充會試副考官九月上以翰隨扈以來昕夕在公鉅細無誤賞戴花翎尋署禮部右侍郎十一年四月兼署吏部左侍郎七月文宗顯皇帝陞遐穆宗毅皇帝御極命恭理喪儀九月以怡親王載垣等竊奪政柄翰不能力爭命退出軍機交王大臣等議罪十月議上請將翰革職發往新疆效力贖罪上原之特諭革職免其發遣同治五年卒子庭珪正三品廕生恩賞舉人庭璞刑部主事

顏伯燾

顏伯燾廣東連平州人祖希深兵部左侍郎父檢漕運總督伯燾嘉慶十九年進士改翰林院庶吉士二十二年散館授編修二十三年充四川鄉試副考官道光二年京察一等記名以道府用七月授陝西延榆綏道六年正月調補督糧道三

月陞按察使八月署布政使七年五月擢甘肅布政使自大軍剿逆回張格爾軍需由蘭州肅州設局轉運伯燾在事出力敘功賞戴花翎八年命督辦蘭肅兩局報銷伯燾依次具奏下部優敘四月調直隸布政使十年七月磁州等州縣地震成災伯燾籌賑迅速上嘉其深知政體敕部議敘九月署陝西巡撫時再定回疆大兵凱撤入關命馳駐肅州辦理軍需十一年事竣命仍回直隸布政使任十月以前署陝西布政使失察西安府同知衙門投充吏役錯誤部議降調特旨改爲降三級留任十二年丁父憂十六年起服授直隸布政使十七年陞雲南巡撫十八年閏四月御史蔡瓊奏言雲南臨安府屬阿迷蒙自與開化府屬文山等流民嘯聚搶劫爲患諭總督伊里布偕伯燾認真查辦六月會奏墾荒保甲章程得旨如議行省城西南滇池匯昆明縣六月之水入昆陽州海口下游凡有疏濬必於上游築土壩截水始克施工事成壩亦隨毀伯燾念工艱費鉅乃改建石牐以時啟閉農民賴之十九年疏請禁種罌粟從之十二月兼署雲貴總督二十年六月御史陸應穀條陳開化臨安廣西各要隘宜移營添汛奉旨飭查伯燾議於開化府文山縣石溜江臨安府蒙自縣均改汛爲營雙水塘改千總大汛邱北縣屬添